

Graduan pinoingat sumodia' monoguang kaantaban

DI KAMARRUDDIN LIUSIN

KOTA KINABALU: Timbang Canselor Univositi Malaysia Sabah (UMS) Prof. Tan. Sri Dr. Abu Hassan Othman minamason di graduan ngaawi' univositi dilo' do toririmo sumodia' tumoguang koinsanai kaantaban om koponugatan katamaan tumopong id nayatan global.

Ka disio, i graduan ngaawi' amu' daa apatut do momusorou nopo do opupusan o kalantaian soira' kaanu ijazah sabab kaantaban karaja' om koposion di pointopot lobi kagayo.

"Mantad dilo' pipiro koposodiaan tinan kiguno do haro doid monikid graduan mooi do kalantai id kaantaban do babaino' diti, wokon dau kopingsingilaan do Boros Inggilis om boros songkosuayan di suai sabaagi pomoruhang di kabaahan diolo' tumopong," ka disio ontok minoboros doid tadau koduo Ramai

Konvokesyen ko-5 UMS id Dewan Konvokesyen univositi dilo' do hiti di konihab.

Ka disio, iti nopo nga' noilaan do boros Inggilis nopo nga' nosili boros pogilulumaagan pomogunan di tosuul.

Ka disio, UMS nokogulampot do umur 9 toun kinoponuridangan dau tumilombus do mimogot miampai mingguos om manahak kopomodulian tosuul id kopomuawangan ababayan balajaran dau mooi do kogulampot ilo' do ko'oit-an univositi kitopong pomogunan.

"Iti nopo nga' kaampai no maya' kopouyuhan ababayan balajaran wagu, miagal do Sarjana Muda Pongusapan i notimpunaan no do pinopointutun di sesi 2003/2004 diti," ka disio.

Minoboros nogi' i Dr Abu Hassan do graduan ngaawi' mositi' no do haro o "software of succes" i kirati do kalantaian id tinan di graduan

ngaawi'.

Ilo' nopo ka disio nga' kopogompit do koyuon pointunud i kiguno do haro id tinan di graduan ngaawi' miagal do kabaahan, disiplin om tonggungan kumaa karaja' di pinatahak suai ko' monginggirot do pogoyuon olidang kougamaan sabaagi tungolig mongingkodou tinan om sinonong ginawo.

Suai ko ilo', ka disio i graduan ngaawi' nga' mositi' nogi' poposili di kalantaian sabaagi koubasanan id koposion om pambalajaran di potilombus mositi' no do pinsingubasan di potuu maso bakaraja' toi ko' maya' kopingsingilaan id nayatan lobi kakawas.

Id sunduk ponoriukan nopo ka disio, nga' nakaanu o UMS do pipiro geran ponoriukan om nakalantai pinopokomosil di pipiro asil pinonoriukan i aanu popointanga', kaampai no pinonoriukan rongilut rahat id Institut Ponoriukan

Marin Borneo, pinonoriukan Kacip Fatimah id Institut Biologi om Tropika Ponondulian gompi', koponoriukan kopotundaan walai kos osiriba' poingimpau do titaam mantad piasau mamau id Sikul Injinior om Teknologi Kopointalangan.

Di konihab kiginumu' 1,100 po o graduan mantad di 2,408 tintob koinsanai graduan minamaramit ijazah diolo' id mogisusuai disiplin toilaan wokon dau Ijazah Sarjana Muda Sains, Ijazah Sarjana Muda Ikonomi, Ijazah Sarjana Muda Balajaran om Pongindopuan.

Di tadau kumoiso' konvoskesyen dilo', kiginumu' do 307 graduan nakaramit do ijazah diolo' mantad di Molohingon Pogun Tun Ahmadshah Abdullah i po nogi' Canselor UMS.

Apat mantad diolo' nakaramit do Ijazah Doktor Falsafah, 21 nakaramit Ijazah Sarjana om i wokon Ijazah Sarjan Muda.